

Լուսիկ Մկրտչյան

ՀԱՅ ԿՆՈՋ ՕԺԱՆԴԱԿՈՒԹՅՈՒՆԸ ՀԱՅ ՀԻՆ ՃԱՐՏԱՐԱՊԵՏՈՒԹՅԱՆԸ

Հայտնի են բազմաթիվ հայ կին գործիչներ, որոնք դեռևս հին դարերից սկսած, ակտիվ մասնակցություն են ունեցել երկրի շինարարության և հայ մշակույթի զարգացման գործում:

Պահպանվում են մեծ թվով հայկական հուշարձաններ, որոնցով հայ կինը հաստատում է իր մասնակցությունը շինարարական աշխատանքներին. դարերի խորքից մեզ հասած բազմաբովանդակ հուշարձաններ, հավերժացնում են այդ կանանց անունները և ցույց տալիս նրանց կատարած արժանահիշատակ գործերը հայկական հին ճարտարապետության մեջ:

Կին ճարտարապետ, բառի իսկական իմաստով, 5—12-րդ դարերում դրօշվար է գտնել, բայց հայ կինը այդ դարերից էլ առաջ իր գործուն մասնակցությունն է ունեցել շինարարության ասպարեզում, նա իր նյութական ու բարոյական օժանդակությունն է բերել հայկական ճարտարապետության զարգացման գործին:

Հայ կինը ոչ միայն միջոցներ է տրամադրել կառուցումներին, այլև խորհրդատու է եղել վարպետներին, նորաձևություններ է մտցրել կառուցումների մեջ և իր անմիջական հսկողությունն է ունեցել շինարարական աշխատանքներում: Խոսելով հայ կնոջ այդ դերի մասին, բանասեր Վ. Հացունին գրում է. «Նա կերևի մերթ գործակից ու խրախուսիչ ամուսնուն կամ զավակաց յուր անձնական կարողությամբ, կամ օժտով զոր բերած էր հայրենի տնեն, և մերթ միայնակ, ապավինված յուր կորովուն ու քսակին, որ իրավունք կուտար ասպարեզին մեջ հանդիսացող կանայք ազնվական հարստներ լինեին: Բայց իրենց նրանց մրցակիցներ, կտեսնենք պարզ քաղաքացիներից ևս, որոնք կցուցանեն եթե ոչ արյան, այլ սրտի և հավատո ազնվականություն մը, և իրենց կարողության չափով կթողուն նման հիշատակներ»¹:

Այդ դարերում եկեղեցաշինությունն ընդհանուր և հրամայողական պահանջ է եղել, ուստի հին հայկական լայնածավալ երկրում կառուցվել են բազմաթիվ եկեղեցիներ, որոնք այսօր դիտվում են որպես հայկական հին ճարտարապետության հուշարձաններ, որոնց վրա իր կնիքն է դրել հնադարյան հայ ճարտարապետը և նրան համընթաց քայլող հայ կինը:

Հայ կինն էլ իր շինարարական գործունեությունն սկսել է եկեղեցիներով, այնուհետև ձեռնամուխ եղել աշխարհիկ շենքերի կառուցման աշխատանքներին: Նրա անմիջական մասնակցությամբ և կամ նրա մեծածախս օժանդակությամբ կառուցվել են եկեղեցիներ, հյուրանոցներ, հիվանդանոցներ, զրատներ, ջրմուղներ, կամուրջներ, բերդեր, աշտարակներ և այլն: Քավության և բարեպաշտության հոգին նրանց թելադրել է այդ «բարեպաշտական» տների

¹ Վ. Հացունի, Հայունին պատմության առջև, Վենետիկ, 1936, էջ 215.

կառուցումը, հանուն «բարեխօսության վասն հոգւոյ» կամ «բաւութիւն վասն մեղաց» ապահովելու համար:

Կանանց շինարարական գործունեութեան մասին պատմում են ոչ միայն մեր պատմիչներն, այլև հնադարյան խաչքարերն ու հուշարձանները:

Ըստ Սյունյաց պատմիչ Ստ. Օրբելյանի, առաջին կին շինարարը եղել է Վարազդուխտ տիկինը, որը «յառաջ քան զհայոց թուականն» կառուցել է իր նահանգի Սյունի Վանաց եկեղեցին, «նորակերտ ձևով, գմբեթահարկ խորան երկնանման»:

Վրաստանի Բոլնիս «Սիոն» եկեղեցին, որը նույնպես հայ կնոջ մտքի ձևունդ է, կառուցվել է 5-րդ դարում Արշիլ թագավորի որդի Միհրդատի կին և Թանի էրիստավ Բարվաբադի դուստր Սանդուխտի հրամանով²:

Բագարանի կաթողիկե եկեղեցին կառուցվել է 624 թ., ճարտարապետի անունը մեզ չի հասել, բայց շինարարական և ձևավորման աշխատանքները կատարվել են Բըտի և նրա կին՝ Աննայի հանձնարարությամբ, իսկ ամուսնու մահից հետո շինարարության գործի հսկողությունը կատարել է ինքն Աննան և այն ավարտել 628 թ.: «Յետ երից ամաց մահան Բըտին կատարեաց զսուրբ եկեղեցին Բըտին ամուսին»³:

Սիրակի Անանիա եկեղեցին, որը գտնվում է Ալման գյուղում, կառուցվել է 637 թ.: «Ես Գրիգոր Եղսուտս եւ Մարիամ իմ կին շինեցաք զսուրբ եկեղեցիս վասն մեր հոգւոց»⁴: Այս եկեղեցին, ըստ մեր պատմիչների, հայ ճարտարապետության հնագույն օրինակներից է: Նրանից ոչ պակաս հին և ճարտարապետության համար հետաքրքիր օրինակ է Մամիկոնյան Գրիգորի «Եւ Հեղինէի նորին զուգակցի» կառուցած Արուձի կաթողիկեն, որը կառուցվել է 669 թ. և կոչվել է «Տաճար փառաց»⁵:

Սյունյաց Գաբուռն Վասակ իշխանի կին Մարիամը, ամուսնու մահից հետո, 874 թ. Սեանի կղզում կառուցել է տվել վանք: Այդ եկեղեցին կառուցվել է խզարդի Մաշտոց վարդապետի հսկողությամբ, իսկ Մարիամը հսկել է նրա ամեն մի քարի դրվածքին և մեծ գումարներ ծախսել այդ շինարարության վրա: Ի դեպ մի բնորոշ մանրամասնություն. շինարարության ավարտումից հետո, երբ վանքը գործել է որպես աղոթատուն, Մարիամին որսիս իգական սեռի ներկայացուցչի արգելվել է մուտք գործել այնտեղ: Նա ստիպված կառուցել է մի փոքրիկ դուռ խորանի կողմից և շերեւակով տղամարդկանց, հետևել է ժամերգությանը⁶:

Շապուհ Բագրատունին տեսնելով քոջ եռանդուն գործունեությունը շինարարության բնագավառում, Մարիամին նշանակում է իր կողմից կառուցվելիք Վանեվանի ս. Լուսավորիչ եկեղեցու վերակացու և տեսուչ. «...Ես Շապուհ Բագրատունիս... մեծափափագ տենչանօք վերակացու և տեսուչ առնելով զբոյր իմ Մարիամ Սինեաց տիկին, յիմումս իշխանութեան ի Վանեվանս տուն Աստուծոյ կանգնեալ վիմատաշ կոփածովք շատածախ գանձիւք և մեծա-

2 Տե՛ս նույն տոմսում, էջ 216: ~

3 Ե. Լ ա լ ա ն, Ազգագրական հանդես, Թիֆլիս, 1901, էջ 432:

4 Նույն տեղում:

5 Ղ. Ա լ ի շ ա ն, Շիրակ, Վենետիկ, 1881, էջ 125:

6 Վ. Հ ա ց ու ն ի, Հայուհին պատմության առջև, էջ 147:

7 Ազգագրական հանդես, 1908, № 1 էջ 57—58:

ջան վաստակովը կատարեալ...»⁸։ Այդպես է Շապուհ Բագրատունին արտահայտել իր գոհունակությունը քրոջ կատարած ծանր ու պատասխանատու աշխատանքի համար։

910 թ. Սյունյաց տիկին Շուշանը կառուցել է տվել հինգ եկեղեցի, որոնց կառուցումները կատարել է ամուսնու թողած գումարով, ինչպես նշել է նա. «...Տէրն իմ երանելին Աշոտ աշխատութեամբ շինեալ էր զսուրբ եկեղեցիքն...»⁹։

Հաղբատի և Սանահնի վանքերը 10-րդ դարում հիմնադրել են Աշոտ Ուրբաթ թագավորն ու նրա կին Խոսրովանուշ թագուհին։ Սակայն շինարարական աշխատանքներով զբաղվել է միայն Խոսրովանուշ թագուհին, այդ պատճառով էլ հիշատակարաններում ու կառուցված շենքերում Խոսրովանուշի անունն է պահպանվել։ «Ի նժՁ թուին շինեցաւ Հաղպատ և Սանահինն երեք ամաւ առաջ քան զՀաղպատ, շինեցաւ ի Խոսրովանուշ թագուհւոյն ի կնոջէ Աշոտոյ Շահնշահի»¹⁰։

Լեոն իր «Հայոց պատմությունում» գրում է, որ Հաղբատի վանքը 967 թ. կառուցել է «Աշոտի ամուսին Խոսրովանուշ հայոց տիկինը։ Նույն տիկնաց տիկինն էր, որ 10 տարի առաջ շինել էր Սանահնի նույնպես հռչակավոր վանքը»¹¹։ Սակայն ըստ Կ. Ղաֆաղարյանի Հաղբատը կառուցվել է 976 թ., իսկ Սանահնը՝ 966 թ.¹²։

Սյունիքի թագուհի Շահանդուխտի ձեռքով 10-րդ դարում կառուցվել է Ուրուտնա վանքը, որը հետո լրացվել է 11-րդ դարում։

10-րդ դարում կառուցվել է Անիի կաթողիկե մեծ եկեղեցին, որի ճարտարապետն է եղել մեծահամբավ Տրդատը։ Եկեղեցին հիմնադրել է Սմբատ թագավորը (976—989 թթ.), իսկ նրա մահից հետո շինարարության գործը ղեկավարել է Կատրամիդե թագուհին։ Ահա արձանագրությունը. «1001-ին... ես Կատրամիդէ հայոց թագուհի, դուստր Վասակայ Սինեայ թագաւորի, յողորմութիւն Աստուծոյ ապավինեցայ շահանշահի, շինեցի զսուրբ Կաթողիկէս, զոր էր հիմնադրեալ Մեծին Սմբատայ եւ կանգնեցաք տուն Աստուծոյ...»¹³։

Երբ Կատրամիդեի ճաշակով և ղեկավարությամբ կառուցված Անիի հռչակավոր կաթողիկեն վեր է խոյացել սլարիսպներից էլ շատ ավելի բարձր, այդ տեսնելով հովիվը դաշտում իր ուրախությունն է հայտնել կնոջը և ռամիկի պարզությամբ հրամայել, որ նա գնա և աղոթի։ Բայց նրա ուրախությունը երկար չի տևել, որովհետև վերջինիս կնոջն անարժան համարելով, ներս չեն թողել։ Հովիվը հասկացել է, որ այդ սքանչելագործ կոթողը կառուցվել է ոչ իրենց համար և նա վրեժի ցասումով լցված հայացքը ուղղել է դեպի արքայական բարձրաբերձ պալատները և բողոքել. «Արքա հզոր, ես խեղճ հովիվս պիտի խորտակեմ քո անբարտապանությունդ, դու հարստությունով, մեծությունով և գորությունով կհպարտանաս, ես շնաշխարհիկ ճաշակովս պիտի խորտակեմ քո գոռոզ գլուխը, ես էլ պիտի կառուցեմ մի տաճար քո դիմաց, թեև փոքրիկ»։

⁸ Ս տ. Օրբելյան, Պատմություն տան Սիսական, էջ 182։

⁹ Նույն տեղում, էջ 236—237։

¹⁰ Սամուել քաճ. Անեցւոյ Հաւարմունք ի գրոց պատմագրաց, էջ 100։

¹¹ Լեոն, Հայոց պատմություն, հատ. 2, Երևան, 1947, էջ 599։

¹² Կ. Ղաֆաղարյան, Հաղբատ, Երևան, 1963, էջ 10—13։

¹³ Ղ. Ալիշան, Շիրակ. 1881, Վենետիկ, էջ 67։

բայց բոլոր փառքովդ պիտի նախանձես նրան, մարդիկ քո կառուցած վիթխարի զանդվածի առջև պիտի ապշին ու սոսկան, և նրա խրոխտ գլուխը շուտով պիտի խոնարհի և սիրտդ ու հոգիդ պիտի թաղե իր փլատակների տակ, սակայն իմ հանճարիս համեստ կոթողը մշտավառ աստղի պես գարուց ի դարս պիտի փայլի...»¹⁴։

Եվ հովիվն ու իր կիներ կառուցում են մի փոքրիկ եկեղեցի, ավելի ճիշտ տապանատուն, որի ճարտարապետության նշանակության մասին ճարտարապետ Թ. Թորամանյանը նկատել է. «Կարելի է ըսել այդ մատուռ կգերազանցե Անիի բոլոր մեծ ու փոքր հիշատակարանները... որը համաշխարհային ճարտարապետության մեջ իր նախորդը չունենալեն դատ, իր ետնորդը հաղիվ տեսնվեցավ ԺԵ—ԺԶ դարերու գոթական արվեստի մեջ»¹⁵։

914 թ. Գագիկ Արծրունի թագավորի կին Մլքե թագուհին Վարագում կառուցել է տվել Աստվածածին եկեղեցին և դրել տվել իր հայտնի ավետարանը, որը չի է մանրանկարչական մեծարժեք նկարներով։ Ահա եկեղեցու արձանագրությունը. «Բմ ձեռամբս... եմ շինեալ յազնականութիւն ինձ եւ արքային իմոյ Գագիկայ եւ զաւակաց իւրոց»¹⁶։ Այս եկեղեցին ունեցել է գոթական սրածեղ կամար, որ չի ունեցել մինչ այդ եղած և ոչ մի եկեղեցի։ Դրա համար էլ ճարտարապետներն այն դիտել են որպես նոր երևույթ այդ դարի համար։ Այդպիսի ոճով երկրորդ եկեղեցի Անիում երևացել է միայն 70 տարի հետո։ Վասպուրականի թագուհի Խուշուշ խաթունը, Մլքե թագուհու օրինակին հետևելով, նրա կառուցած եկեղեցու կողքին 981 թ. կառուցել է տվել «Ս. Սոփիա Տաճարս վասն փրկութեան հոգւոյս և ննջեցելոյս...»¹⁷։

Շուշիկ Պահլավունին նույնպես շինարարական գործերում հետ չի մնացել մյուսներից։ Ամուսնու մահից հետո 986 թ. հիմնադրել է Մարմաշենի եկեղեցին և այն ավարտել 1025 թ.¹⁸, իսկ հետո ձեռնամուխ եղել մի շարք այլ շինարարական կառուցումների։

Զաքարե և Իվանե սպասալարերին մղած երկարատև պատերազմներն ու հաղթական արշավանքները նպաստել են նրանց և մյուս զորավարներին կուտակելու մեծաքանակ հարստություն, որը և հնարավորություն է տվել նրանց ծավալելու շինարարական մեծ գործունեություն, և նրանք, ինչպես և նրանց ժամանակակից իշխանները և իշխանուհիները, հետևելով միմյանց օրինակին, կառուցել են տվել ոչ միայն եկեղեցիներ, այլև պալատներ, բերդեր, աշտարակներ, գրատներ, իջևանատներ, բաղնիքներ, վանքերին կից ուսումնարաններ, ջրմուղներ, ջրամբարներ և սալահատակված ճանապարհներ և այլն։

Հ. Մանանդյանը նշելով այս շրջանի շինարարական աշխատանքների մեծ թափը, միաժամանակ ցույց է տվել Զաքարյանների կանանց ու դուստրերի ակտիվ գործունեությունը շինարարության մեջ, և նրանց ջանքերով կառուցված այն մեծ թվով կոթողները, որոնցով հարստացել է հայկական հին ճար-

14 Թ. Թորամանյան, Դեղունի, № 6, 1909, էջ 35։

15 Նույն տեղում։

16 Ղ. Ալիշան, Շիրակ, Վենետիկ, 1881, էջ 67։

17 Վ. Հալուստյանի, Հայուհին պատմության առջև, էջ 227։

18 Նույն տեղում։

տարապետությունը: Կանանց գործունեության մասին Հ. Մանանգյանը գրում է. «Առանձնապես ուշագրավ է, որ այս շինարարությանը մեծ չափով մասնակից են եղել, ինչպես երևում է վիմական արձանագրությունների վկայություններից, հայ իշխանների կանայք և դուստրերը: Այսպես, օրինակ, Կյուրիկե Բ-ի դուստրերը՝ Իվանե Օրրելյանի կին Ռուսուդանը, հաշենի Հասան իշխանի կին Մամքանը և սրանց քույրերը՝ Մարիամը, Վանեն և Բորինան հայտնի են իրենց շինարարական գործերով Քոբայրի, Հաղբատի, Սանահնի, Խութա և այլ վանքերի մեջ»¹⁹:

Կյուրիկե (Գուրգեն) թագավորի երեք դուստրերը՝ Մարիամը, Բորինան և Ռուսուդան (կամ Ռուսուդան) կառուցել են Սանահնի վանքի գավթի երեք սյուները հոյակապ կամարներով, որոնք ճարտարապետության լավագույն օրինակներից են: Մարիամը 1153 թ. կառուցել է տվել և Քոբայրի եկեղեցին²⁰:

Դեսումյանց Հասան իշխանի դուստր՝ Խաթունը Հաղբատում 13-րդ դարում կառուցել է տվել մի եկեղեցի, որը ճարտարապետության մեջ համարվում է մեծարժեք կառուցում և հազվագյուտ օրինակներից մեկը²¹:

1214 թ. Քրդի դուստր, Վախտանդի կին Արդու խաթունի ձեռքով կառուցվել է Դադի վանքի գլխավոր եկեղեցին²²: Ումեկ իշխանի կին Թագուհին 1251 թ. Տփղիսում կառուցել է տվել ս. Գևորգ եկեղեցին²³:

1513 թ. Զինաստանի Զուանչու քաղաքում ապրել են հայեր, ուր մի հայ տիկին կառուցել է տվել և կաթողիկ արքեպիսկոպոսին նվիրել մեծարժեք եկեղեցի, որն օգտագործվել է որպես մայր տաճար: Այդ նույն հայուհին հոգեվորականների ապրելու համար շինել է տվել շենքեր և այդ շենքերի հետագա վերանորոգման համար նույնիսկ թողել մեծ գումար²⁴:

Հաղբատում 1195 թ. կառուցվել է և Զգրաշեն եկեղեցի՝ Սելամա անունով տիկնոջ կողմից²⁵: Ըստ Հակոբ Երեցի արձանագրության, 1317 թ. Աշտարակում, Զաքարե Սպասալարի թոռան թոռ Աղբուղայի կին Սիթի խաթունը կառուցել է մի եկեղեցի²⁶: Զուխտակ եկեղեցին, որը գտնվում է Դիլիջանից Կիրովական տանող ճանապարհից 3 կիլոմետր հեռու, անտառում, շինել են Դալիտան և Խատուրը, քույր և եղբայր, այդ պատճառով էլ եկեղեցին Զուխտակ է կոչվել:

Կանայք մեծ եռանդով ձեռնամուխ են եղել նաև հիվանդանոցային շենքերի կառուցման աշխատանքներին: Նրանք ոչ միայն մեծ գումարներ են ծախսել այդ տների կառուցման վրա, այլև իրենց անմիջական մասնակցությունն են ունեցել կառուցման աշխատանքներին: Այսպես՝ 967 թ. Հաղբատում Աշոտ Ողորմած թագավորի կին Խոսրովանուշ թագուհին մի շարք կառուցումների հետ կառուցել է տալիս նաև հիվանդանոց, — «ղարմանատուն» և անձամբ հսկել հիվանդներին, որոնց մեջ եղել են և բորոտներ:

19 Հ. Մանանգյան, Քննական տեսություն հայ ժողովրդի պատմության, հատ. 3, Երևան, 1952, էջ 166—167:

20 Վ. Բարձրբերդցի, էջ 122:

21 Կ. Ղաֆադարյան, Հաղբատ, Երևան, 1963, էջ 60—62, 220:

22 Տ. Տեր-Մովսեսյան, Հայկական երեք վանքեր Երուսաղեմում, 1938, էջ 84:

23 Գ. Հովսեփյան, Նյութեր և ուսումնասիրություններ, էջ 9—10:

24 Դերենիկ Եպիսկ. Զինաստանի վաճառականներ, «Սիոն», 1959, № 8—9, էջ 276:

25 Կ. Ղաֆադարյան, Հաղբատ, էջ 237:

26 Վ. Հացոունի, Հայուհին պատմության առջև, էջ 233:

Այդ նույն ժամանակաշրջանում հիվանդատներ ու որբախնամ տներ է կառուցել տվել նաև Տիկնաց տիկին Շուշիկը և զբաղվել է բուժման աշխատանքներով, որի մասին հիշատակել է նրա թոռը՝ Գրիգոր Մագիստրոսը²⁷։

Հետևելով բուն Հայաստանում կատարվող օրինակներին, Կիլիկիայի թագուհի Զապելը նույնպես ձեռնարկում է մի շարք կառուցումներ։ Նա կառուցել է տվել որբախնամ տներ, ծերանոց և հիվանդատներ։ Այս մասին կիլիկյան հիշատակագիրը գրում է. «Դոգեաց տունս ի Սիս հիւանդանոց մի...» և բերում է արձանագրությունը. «Յարմարումն շինուածոյ հիւանդանոցիս քրիստոսասէր թագուհւոյ Զապելի ի թուին հայոց ՈՌ (1241 թ.)»²⁸։

Միջնադարում, երբ զարգանում են ու տարածվում քաղաքները և լայն ծավալ է ստանում առևտուրը, մեծ ճանապարհների վրա, քաղաքներում ու գյուղերում կառուցվում են և քարավանատներ ու հյուրանոցներ։ Բազմավաստակ ճարտարապետ Թ. Թորամանյանը այս մասին գրել է. «Պատմական ակնարկներից և մեզ հասած արձանագրություններից գիտենք, որ բազմաթիվ հաստատություններ կային օտարանոց, ասպնջականոց, հյուրանոց, իջևան և այլ անուններով, որոնք մեծ մասամբ ծառայում էին օտարական ճանապարհորդների, աղքատ անցորդների... համար»²⁹։

Այս կարևոր գործում հայ կինը հանդես է եկել ոչ միայն որպես նվիրատու, այլև «հինքն հիմնադիր հյուրանոցաց»³⁰, — գրում է բանասեր Վ. Հացունին։ Գանայք մեծ նվիրատվություններ են արել այդ տների տնտեսական հիմքի ամրապնդման համար։ Այսպես, Մինա խաթունը 1274 թ., Սյունյաց լեզնգիք ավանում, իր ամուսին Տարսայիճի հետ կառուցել են տվել մի հյուրանոց, և այդպիսի մի հյուրանոց էլ կառուցել են նոր Ավանում ու ապահովել հողամասով։

1317 թ. Հակոբ երեցն արձանագրել է, որ Զաքարե Սպասալարի թոռան թոռ պարոն Աղբուղայի և նրա կին Սիթի խաթունի ծախսով Աշտարակում կառուցվել է մի հյուրանոց³¹։

1332 թ. Վայոց ձորում հյուրանոց կամ «հոգետուն» են կառուցել Խորիշահ դուստր Վարդան իշխանի, կին Զեսարի, հետո այդ կոչվել է Սելիմի կառավանատուն³²։

Հայ կինը զբաղվել է նաև ձեռագրեր ընդօրինակելու ծանր ու մեծ հմտությամբ՝ պահանջող աշխատանքով, ինչպես և այդ ձեռագրերի հավաքման ու պահպանման, գրչության օջախների կառուցման աշխատանքներով։ Նա իր կարողության համեմատ (հարուստներն իրենց նյութական միջոցներով, աղքատներն իրենց աշխատանքով), ակտիվ մասնակցություն են ունեցել հայ մշակույթի օջախների կառուցմանը, սիրել ու պահպանել են հայկական հուշարձանները։ Այդ գրատների շնորհիվ է, որ որոշ վանքերում, հակառակ սոսկալի ավերի ու ավարառությունների, այնուամենայնիվ, պահպանվել են և մեզ հասել արժեքավոր ձեռագրական ժողովածուներ սկսած 10-րդ դարից։

27 Կ. Կոստանյան, Գրիգոր Մագիստրոսի թղթերը, էջ ԺԷ։

28 Վ. Հացունի, Հայուհին պատմության առջև, էջ 235։

29 Թ. Թորամանյան, Նյութեր հայ ճարտ., հատ. 1, էջ 97։

30 Վ. Հացունի, Հայուհին պատմության առջև, էջ 233։

31 Նույն տեղում։

32 Հ. Աճառյան, Հայոց անձն. քառ., Նրևան, 1944, էջ 546։

Այսպես՝ 1063 թ. Դավիթ արքայի դուստր Հրանուշ թագուհին Սանահնում կառուցել է տվել գրատուն և այն հատկացրել է նշխարներ և մատյաններ պահելու համար: Գրատունը բաղկացած էր երեք կարգ սյունազարդ խորշ կամարներից և յուրաքանչյուր սյունը կերտված էր մի ամբողջ քարից. «Ի ՇԺԲ թուին հայոց... ես Հրանուշ թագուհի՝ դուստր Դավիթ արքայի, շինեցի զնշխարատունս եւ զեկեղեցիս եւ ետու զնորաշենքս ի Սանահնս, վասն իմ մեղաց...»³³:

1277 թ. Սեդա անունով մի կին, իր ամուսնու հետ միասին, հավաքած գումարներով կառուցել է տվել նշխարատուն և եկեղեցու հատուկ դուռը, որի կառուցողն է եղել Կարնեցի ֆրեյ վարպետը. «Թվ. ՋԻԶ... ես Առիւծս հողեւ... Սարգսի որդիս եւ կենակից իմ Սէդա շինեցաք ի մեր հալալ արդեանց զնըշխա/րա/տունս ի մեր ժամատան դուռս յիշատակ ծնողաց մերոց...»³⁴:

Մամախաթունը և նրա ամուսին Վաչեն 1229 թ. կառուցել են նշխարատուն և Հոռոմոսի վանքը³⁵:

Խորիշահ Մամիկոնյանը, դուստր մարզպան Մամիկոնյանի, կին Քուրդ իշխանի (Արագածոտն), ամուսնու հետ միասին, 1235 թ. կառուցել է Սաղմոսավանքի գրատունն ու մատուռը, իսկ 1250 թ.՝ Հովհաննավանքը՝ ի հիշատակ իրենց վաղամեռիկ դուստր Մամախաթունի³⁶:

Ինչպես մյուս շինարարական հարցերում, այնպես էլ ջրմուղների շինարարության գործում կանայք մեծ ջանասիրություն են հանդես բերել: Առյուծ հոգևորանց Սեդան, 1251-ին վերակառուցում է Հոռոմոսի վանքի ջրմուղը, որը ավերվել էր թաթարների կողմից³⁷:

1310 թ. շահնշահ Բ. Աթաբեկի պաշտոնյան Մաթեն և նրա կին Թենին նորոգում են Անիի ս. Գրիգոր վանքի ջրմուղը, որը քանդված է եղել զանազան արշավանքների ընթացքում³⁸:

Այնուհետև 1318 թ. Ագիլբեկ և Վախախ ամուսինները ձեռնարկել են Եղվարդի ջրմուղի վերանորոգումը: Նրանք ջուրը բերել են Արարատյան լեռներից, հասցրել Եղվարդ գյուղը. «Ոչ հաշվելով զծախսն, զանհասանելի երկրաշափ հեռաւորութիւն տեղւոյն, շրջապատեալ զլեառն Արարատեան հասուցին զջուրն յորդառատ վտակօք փոյթրնկաց յԵղվարդ, զգնացս ջրոյն», — գրում է հիշատակագիրը, շթաքցնելով իր զարմանքը նրանց առատաձեռնության վրա և միևնույն ժամանակ ավելացնում, որ այդ շրջանում, մինչև ջրմուղի կառուցումը, սարսափելի չորային է եղել, անգամ մարդիկ խուսափել են այդ կողմերով ճանապարհորդել: Իսկ այդ ջրով «նորափետուր զարդարեցան և զվարճացան ամենայն կենդանիք, մարդ և անասուն, բայց ի գին ծանր դրամոց այսպէս, որ զտուրս արուեստաւորացն եւ զամենայն ծախսն ո՞վ կարէ ընդ գրով արկանել»³⁹:

Հայրենիքի պաշտպանության գործն իր կնիքն է դրել հայկական ճարտարապետության վրա: Այդ գործից հեռու կանգնած չի եղել և հայ կինը, որը

33 Կ. Ղ ա ֆ ա դ ա ր յ ա ն, Սանահնի վանքը և նրա արձանագրությունները, 1957, էջ 187:

34 Ղ. Ա ի շ ա ն, Շիրակ, Վենետիկ, 1881, էջ 25:

35 Կ. Ղ ա ֆ ա դ ա ր յ ա ն, Հովհաննավանքը և նրա արձանագրությունները, Երևան, 1948, էջ 82:

36 Զ. Ա ճ ա ո յ ա ն, Հայոց անձ. բառ., հատ. Բ, 1944, էջ 545:

37 Վ. Հ ա ց ու ն ի, Հայուհին պատմության առջև, էջ 236:

38 Ղ. Ա ի շ ա ն, Շիրակ, էջ 79:

39 Ղ. Ա ի շ ա ն, Այրարատ, էջ 197:

տղամարդկանց հետ միասին կառուցել է բերդեր ու աշտարակներ՝ հայրենիքը ստար ոսոխների ոտնձգություններից պաշտպանելու համար: Այդ մասին Ստ. Օրբելյանը գրում է. «Մի ոմն ի կանանց նոյն նահապետացն Երնջիկ անուն, շինէ և զանհնարին ամուրն Երնջակ, և իւր անուն բերդն և գաւառն կոչի իրնջակայ...»⁴⁰:

Անիի հռչակավոր ու ամրակուռ բերդերն իրենց պարիսպներով ու աշտարակներով պաշտպանել են կովոդ հայ ղինվորներին: Հայուհին ոչ միայն կառուցման աշխատանքներին է մասնակցել, այլև քաջաբար կռվել է ոսոխի դեմ: Այսպես, Այծամն Անեցին 1125 թ. քաջաբար կռվել է Անիի վրա արշաված Փատուն ամիրայի զորքերի դեմ «...և էր անուն նորա րստ արժանի արագութեան իւրոյ, Այծամն կոչեցեալ»⁴¹:

Ինչպես ճարտարապետական բոլոր կառուցումների բնագավառում, այնպես էլ կամուրջների շինարարության մեջ հայ կինը ցույց է տվել իր ժրաշան պործունեությունը: Այսպես, օրինակ՝ 1192 թ. Զաքարեի որդի իշխանաց իշխան Սարգսի դուստր և Աբաս թագավորի կին Վանենին կառուցել է Սանահնի նշանավոր կամուրջը Դեբետ գետի վրա: Կամրջի գլխին նա կանգնեցրել է մի խաչքար, որը ջարգվել է 1795 թ. Աղա Մահմադ խանի արշավանքի ընթացքում: Այդ խաչքարն ունի հետևյալ արձանագրությունը. «(ա)ղգին Բագրատունեաց ես Վանենի, դուստր իշխանաց իշխան Սարգսի, որդո Զաքարէի, կին Աբասա թագաւորի, որ կիսաւրէ վախճանեալ խաւարեցոյց զմեզ, շինեցի զկամուրջս եւ կանգնեցի զխաչս յիշատակ նմա եւ մխիթար ինձ եւ ի կեանս ծնողաց եւ եղբարց իմոց...»⁴²: Այդ հուշակապ կամուրջն այսօր 768 տարեկան է: Դեռևս կես դար առաջ նրա վրայով անցնում էին բեռնավորված ուղտերի կարավաններ, իսկ այսօր անցնում են բեռնավորված ավտոմեքենաներ: Ծարտարապետական այս հնագույն և միաժամանակ լավագույն օրինակը հայ կնոջ մտահղացման արդյունք է: Այնուհետև Ասփա անունով մի հայուհի Արցախի Թարթառ մեծ գետի վրա շինել է տվել մի կամուրջ, որը լստ մեր հետագա պատմագիրների, դեռևս իրենց ժամանակ կանգուն է եղել⁴³:

Ներկայացնելով այս հոգվածն ընթերցողի ուշադրությանը, ցանկացել ենք մասնակիորեն ծանոթացնել նրան հայ կնոջ հայկական հին ճարտարապետության բնագավառում կատարած զգալի աշխատանքին: Ինչպես ճարտարապետ Վ. Հարությունյանն է գրել. «Հայկական ճարտարապետությունը հայ ժողովրդի բաղմադարյան և բովանավոր շինարարական գործունեության ծանրակշիռ քարե մատյանն է: Այդ մատյանը բաղմաբովանդակ է ու հետաքրքիր, նրա յուրաքանչյուր էջը գրված է ժողովրդի ստեղծագործ ձեռքով և արտահայտում է նրա կյանքն ու հոգեկան հարուստ աշխարհը, կառուցողների բարձր վարպետությունը»⁴⁴:

40 Ստ. Օրբելյան, Պատմութիւն տանն Սիսական, էջ 13:

41 Սամուէլ քահ. Անեցոյ Հաւարմունք գրոց պատմագրաց, Վաղարշապատ, 1993, էջ 126—127:

42 Կ. Ղաֆադարյան, Սանահնի վանքը..., Երևան, 1957, էջ 185—186:

43 Վ. Հացունի, Հայուհին պատմության առջև, էջ 236:

44 Վ. Մ. Հարությունյան, Միջնադարյան Հայաստանի քարավանատներն ու կամուրջները, Երևան, 1960, էջ 125:

Այդ քարե բազմաբովանդակ մատյանում հայ կինը նույնպես ունի իր զգալի ավանդը և նրա անունն էլ անջնջելի կերպով արձանագրված է այդ մատյանի էջերում:

Лусик Мкртчян

УЧАСТИЕ АРМЯНСКИХ ЖЕНЩИН В СОЗДАНИИ СТАРЫХ АРМЯНСКИХ АРХИТЕКТУРНЫХ СООРУЖЕНИЙ

(Р е з ю м е)

Сохранились до нашего времени многочисленные исторические памятники, надписи на которых рассказывают о той значительной роли и активном участии армянок в строительстве ряда архитектурных сооружений.

О первой армянке-архитекторе госпоже Вараздухт упоминает историк Ст. Орбелян: «еще до армянского летоисчисления» она построила в Сюнике церковь Ванац. При активном участии армянок были воздвигнуты не только многочисленные церкви и соборы, и другие архитектурные памятники, но и ряд больничных строений, приюты для сирот и стариков, а также дома для гостей и постоялые дворы («караван-сарай»). Еще в 967 году в Ахбате была построена царицей Хосровануш «дарманатун» (больница).

Строя ряд памятников и основывая дома, служащие разным целям, армянки заботились об их благоустройстве и дальнейшем сохранении. В частности они очень заботились о постройке библиотек и сохранении культурных ценностей—особенно рукописей, в создании которых принимали участие они сами в качестве писцов.

В статье также приводятся факты, подтверждающие активное участие армянок в строительстве каналов, водонапорных башен, мостов, а также крепостей с башнями и опорными стенами.